



22. april 2026

UPA2026/8

## **Inatsisartut ilassutit aningaasaliissutinut inatsisissaannut siunnersuut 2025.**

(Aningaasaqarnermut Naalakkersuisoq)

Siumut sinnerlugu qujavugut ilassutit aningaasaliissutissat siunnersuummut saqqummiunneqartumut.

Naalakkersuisut aningaasarsiornikkut ineriartornissamut ernumanerat Siumup paasisinnaavaa. Aalisarnermit isertitat aalisakkanut qalerualinnut pisassat appariartornerat tunngavigalugu isertitat appariartuleqqapput. Tamanna inatsimmit kisimi toqqammavilersorniarneqaattaartoq tunngavilersorniarneqartoq Siumumiit arajutsisimangilarput. Tamanna eqqoqqissaanngilaq, tassami aalisakkanik qalerualinnik pisassiissutit TAC-mik annertussusiliinerit ilisimatuussutsikkut pisassiissutit (tassa biolog-it) innersuussutaat tusaallugit ukiumiit ukiumut pisassiisoqartarmat, taamaasilluni pisassiissutit MSC-mik meqqilinni (mærke) tunngavigalugit annertussusilerneqartarlutik. Taakkulu pisassat appariartorneranut peqqutaanerpaajupput.

Namminersorlutik Oqartussat suliffeqarfiutaannit isertitassat naatsorsuutigisat annikillinikuupput, aammalu inuiaqatigiinni ukioqqortussutsikkut katitigaanerput eqqarsaatigalugu siunissami aningaasartuutigit qaffakkiartuinnassanngippata tamatta kivitseqataalluta suleqataasariaqarnerput piumasaqaataanera annertusiartuinnartussaasoq Siumumiit arajutsisimangilarput.

Taamaattumik pisariaqarpoq nutarterinissamut ingerlatsinissat aammalu aalajangiinerit akisussaassuseqartumik ingerlanneqassasut, taamaalilluta aningaasarsiornikkut tunngavigisavut ineriartorlutillu patajaallisarneqarniassammata.

Nunatta aningaasatigit killiffia eqqarsaatigalugu siorna Siumumiit piumasaraarput ingerlatseqatigiiffik Nuna Green A/S 400 mio. aningaasaliiffigineqartoq allangortinneqartariaqartoq, taakkumi aningaasat nunatta karsianut iluaqutaanerusumik aaqiisoqartariaqalermat aammalu immikkut suliffeqarfimmik taamatut pilersitsisimanerup nutaamik allatut aaqinneqarnissaa pillugu aningaasaliissutit utertinneqarnissaast pisariaqartoq. Tamannalu pillugu Siumumiit paaserusupparput suliaq tamanna pillugu sumut killitooqarnersoq.

Naak nalungikkaluarlutigu 2024-imi partiit sisamat atsioqatigiissimanerannik tunngaveqartoq. Isumaqarpugut soorlu ingerlatseqatigiiffik Nukissiorfiit suliamik tamatumingga aamma



ingerlatsisinnanera aqutissiuunneqarsinnaasoq. Taamaasilluni erngup nukinganik nukissiuuteqarneq aammalu nukissiuutinik ingerlatsineq ataatsimoortumik Nukissiorfiit iluanni pissusissamisoortumik ingerlanneqarpoq, aamma suliffeqarfiup taassuma nunatta nukissamik pilersorneqarnera tamatta sinnerluta isumagisaraa. Taamaattumik Siumumiit ingerlatseqatigiiffiit katitigaanerat pillugu isumaqarpugut, ingerlatseqatigiiffiit imminnut assingusut kattussuutsinneqarnerat Naalackersuisut sukkatsisarlugu ingerlattariaqaleraat. Tamannami aammaarluta eqqaarqipparput isumaqaratta taamaaliornikkut piginnittuunermut politikkimut partiit sisamat atsioqatigiissutigisimasaannut naapertuuttumik aaqqiisoqassasoq.

Ilassutissatut aningaasaliissutit 2025-imoortut eqqarsaatigalugit bilag-ini takuneqarsinnaavoq Aningaasaqarnermut Akileraartarnermullu ataatsimiisitaliamit aningaasat 39 mio. ikinnerunngitsut pillugit ilassutissatut aningaasaliinerit ingerlanneqarsimasut. Tassa aningaasat aningaasanut inatsimmi immikkoortinneqareersut akuerineqareersullu saniatigut suliat ilaatigut taamak nalillit suliarineqarlutik. Suliallu taakkua tamarluinnarmik ataatsimiisitaliami saqqummiunneqarlutillu isummerfigineqareersuupput. Eqqumiigineqarsinnaavorlu sooq akuereriikkasi maanna aamma sammeqqilerpisigit? Kisianni tassa inatsisitigut pisussaaffiit taamaammata suliat maanna Inatsisartutigoorlu naqissuserneqarluni suliarineqarpoq.

Siumup nangittumik aningaasarsiornikkut politiki akisussaassuseqartoq ingerlatissavaa, aammalu innuttaasunut aningaasaataanik ataqqinnilluni ingerlatsineq ilanngullugu. Qanoq ingerlariaqqinnissarput pillugu oqallinnermut erseqqissuliorluta peqataasaagut aamma aaqqissuusseqqinnissat pisariaqartut pillugit. Kisianni erseqqissunik pingaarnersiuisoqarnissaa pisariaqartoq Siumut isumaqarpoq. Inuiaqatigiinni aningaasarsiornikkut nukittorsaanissaq pisariaqarmat.

Taama oqaaseqarluta ilassutitut aningaasaliissutitut akuersaassagatta ilisimatitsissutigissavarput, kiisalu aningaasaqarnermut akileraartarnermullu ataatsimiisitaliamut ingerlateqqinnissaat innersuullutigu.

Erik Jensen  
Siumut